

معاهدة سلام

يوم جديد ..

والشمس تشرق معلنة

إن البداية م العدم مُمكنة

بنوتة في العشرين يا دوب

بتفتح عنيتها ..

تلقى بدل النور .. حروب

بنت في العشرين صحيح

لكن توهتها في الدروب

تسرق ليالي عمرها

مين م البنات في سنها

خاف م الشروق !

مين زيتها !

خافت تدوق من الفرح

يمكن تحسره

بتخبى دايم قلبها

للحد الي يقدره

أو بمعنى أصح يعني..

بتستخسره ..

في الجرح والي ميصونوش

بتقول تملي لنفسها

قاعدة واحدة ..

كل الوشوش أغراب

قاعدة اتنين ..

الحب أصله سراب

والقلب يا الله

ملوش سواك أحباب

صارت بتبنى م القواعد سور

وحصون بتحمى قلبها
مع إنها ..
ولا لحظة حسّت بالأمان
يوم جديد
والشمس تشرق معلنة
الحرب على كل القيود
وجنود تداهم حصرها
مين العدو !
نظرة من بني بشر
قدرت تعدي جسرهما
حسّت خطر.. بعدت
فقرب م القمر
وقطفلها م الليل نجوم
إتعجبت من روحها لما اتبسمت

ثم أوام إستسلمت
طبطبت روحه عليها.. إطمنت
حب روحها... فانتصر
إنه يا سادة القدر
وكأنها كانت عدوة لنفسها
وإتحولت الحرب بيه
لهدنة ومعاهدة سلام
مبقتش محتاجة لحيطان
تسند عليها ضعفها
صارلها عكاز وبيت
ولا يوم في عمره ملّها
ويوم جديد.. والشمس تشرق معلنة
إن البداية م العدم ..
أكيد وحتماً ممكنة ..